

† Sier Sebastian Loredan, el XL criminal, qu. sier Zuane . . . . .	107. 86
Sier Zuan Alvise Pasqualigo qu. sier Cosma . . . . .	75.121
Sier Zorzi Valaresso, fo Cao di XL, qu. sier Marco . . . . .	77.118
Sier Zacaria Bembo, fo provedador a Bassan, qu. sier Francesco . . .	59.139
Sier Antonio Contarini, qu. sier Zentil, qu. sier Andrea procurator . .	99. 90
Non. Sier Lorenzo Vituri, el XL criminal, qu. sier Daniel, per esser rimasto . . . . .	

A dì 13, *Domenega*. La matina, in Colegio si apresentò il soracomito di Salò Gabriel di Barzoni, et il soracomito fato per li rectori di Verona nominato Tholozo Gualtier, et fo termenato, per Colegio, darli le galie et mandar li a far le zurme, quale non voleano venir con la parte nova, et scritto a Salò et Verona che armino al modo novo. *Item*, fo expedito el soracomito di Napoli di Romania, Nicolò di Nassin, e datoli li danari et spazato l'arsil.

Fo fato li officiali di le galie di Baruto, fato armirao Nadal da Cataro, comiti Pasqualin Valaresso et Saba di Cypro, et li paroni Piero Mose et Santo di Venecia . . . . ., Sydro da Venecia.

Da poi disnar, fo Gran Consejo. Posto la parte presa in Pregadi a di 5 de l'istante, zercha i Consieri da basso, che non possino esser electi Savii dil Consejo; la copia di la qual parte ho notata qui avanti. Et Io Marin Sanudo, mosso da conscientia che l'officio di Savii dil Consejo è il supremo officio si dagi in questa Republica al governo dil Stado, et però dil 1440 a di primo Octubrio, fu preso li Savii dil Consejo potesseno esser electi di ogni loco e officio, e officio continuo, et questo si osserva fin questo zorno. Nè obsta la parte dil 1423, 28 Agosto, in *Fronesis*, che vol li Consieri non possino esser electi ad alcun officio si non a la Procuratia e Patroni a l'Arsenal, perchè a quel tempo non era Consieri da basso. Poi, dil 1437, a di 15 Decembrio, in questo Consejo, apar in *Ursa*, fu posto li Consieri ensiva di la banca servisse a la Quarantia criminal, havesseno salario, potesseno esser electi dentro e di fuora, come chiaramente la vol, *quod possint eligi ad omnia*, benchè dil 1438 fusse fato una termenation, per la Signoria, che uno era Consier da basso, tolto Savio di Tera ferma, che non si potesse provar; la qual dil 1511 fo tajata per li Avogadori di Comun in Quarantia, come fata da zudexi incompetenti. Alegai il danno fa questa parte, che li primi

senatori non possino esser nominati Savii dil Consejo, ch'è il timon di questo Stado e vien tolto Governadori e altri; et tanto più quanto è stà preso in Pregadi che *de cætero* li Consieri si fazi con li boletini, et non si possi mandar debitori se con effecto non sarano debitori; la qual parte si ha a meter a questo Consejo. Però sarano li primi di la terra; e servido di sora, non volemo i possi esser nominati Savii dil Consejo? mala opinion! privemo i primarii senatori, si perchè di Procuratori che ha cresudo il numero non pol esser si non 3, uno per Procuratia, si perchè i Savii dil Consejo si caza con i Savii di Terra ferma per la parte nova, cossa mai più fata. Adesso mo' che li Consieri da basso non possino esser privadi è mala deliberation, perchè, metando li primarii senatori al governo dil Stado, *tunc* el Stado è ben governado; con altre parole, persuadendo il Consejo a non voler la parte, *maxime* che i non possi esser nominati Savii dil Consejo, ma ben in altri officii, come dil 1519, a di . . . Avosto, in questo Consejo fu termenato; laudando la parte di le contumatie fu presa, aziò tutti partecipi di honori di questo eccellentissimo Stado. Fui aldito con atentissima audientia da tutti, che niun spudoe; pur feci lezer le leze; *tamen* il Consejo vol tutti habi contumalia, nè si cura di altro, e questo sapeva avanti montasse in renga, *tamen* vulsi descargar la consciencia mia. Andò in renga per contradirmi un certo sier Francesco Morexini qu. sier Piero, dito *Sguatarin Barbasso*, qual non fo inteso, ni aldito per non aver voxè, ni saper quello el se dicesse. Andò la parte: 14 non sincere, 504 di no, 961 di si; et fu presa.

Fu poi, per li Consieri, una altra parte presa in ditto Consejo di Pregadi a di 10 di questo, *videlicet* che, havendo rechiesto l'orator di Pago, che atento quella comunità donasse l'intrada di quella ixola a la Signoria nostra, e il rector, zoè Conte vi va ha *solum* ducati 9 neti al mexe, rechiede li sia dà augumento atento ditte intrade è augumentade; pertanto sia preso che il Conte *pro tempore* sarà electo, habi in tutto ducati 16 al mexe neti, come ha il conte di Arbe, et sii electo per 4 man di eletion, che prima si feva per do man. Ave 1017 di si, 269 di no, 23 non sincere.

In questa matina, in Colegio, fu preso che a domino Gabriel di Martinengo, va in l'isola di Cipro come è stà preso in Pregadi, che 'l dito fazi eletion de 20 homeni di capo che sianò valorosi da menar con lui con ducati 10 al mexe a page 8 a l'anno. *Item*, 10 capi di schiopetieri con ducati 5 a page 8,